

ATVODU VĒRDI LEOPOLDAM KEMPAM**

1927. 30. IV–2014. 3. XI

Myužēibas ceļūs devīs Latgolas kulturvēstures pētnīks, publicists Leopolds Kemps. Jys beja sabīdriskō darbinīka un politiķa Franča Kempa un literates Konstances Daugules-Kempas jaunōkais dāls. Gimīnē auga vacōkī dāli Oļģerts un Romualds.

Dzimis Ludzas apriņķa Zvērgzdines pogostā, kur vacōkim pīderēja dzērnovas. Sevišķi nūzeimeigas Leopolda dzeivē beja jō garōs pastaigas ar tāvu Cirmas azara krostā – sarunas par Latgolas vēsturi, par latgalīšu dorbōšonūs Pīterpilī, par izcylim cylvākim (t. sk. arī par Franča Kempa mōtes Martas brōli Pīteri Miglinīku, zemnīku tīseibu aizstōvi).

* Pēc: Kanadas Latviešu katoļu apvienības *Vēstis*. – 2014, dec., Nr. 3.
(Red.)

** Pēc: *Katōļu Dzeive*. – 2014, 12. (Red.)

Leopolda jauneibas godi ikryta gryutā, brīsmu plynā laikā. Jō brōli naatsagrīze nu kara. Jauneibas idealisma vadeits, Leopolds īsasaisteja Latvijas Centralōs padūmes darbeibā un tyka arestāts: 1945. godā nūtīsōts iz 10 godim lobōšonas dorbu nūmetnēs. Smogs dorbs Vorkutas mežūs, ūgļu roktuvēs...

Atsagrīzis Latvijā pēc sūda izcīsšonas, ar cereibu īsakōrtōt iz dzeivi Rēzeknē – nu jau nu *loba prōta* devēs atpakaļ iz zīmelim: strōdōja tamōs pat šahtōs Komi republikas Intas piļsātā, tikai kai breivs cylvāks, specialists. Te jys apsaprecej ar Skaidreiti, izsyuteitu meitini nu Alūksnes, giminē aug meiteņa Līvija. Septeņdasmytajūs godūs Kempu gimine beidzūt atsagrīž dzimtinē un apsamat iz dzeivi Līvānūs, kur Leopolds strōdoj Līvānu Mōju byuves kombinatā.

Vysi turpmōkī Leopolda Kempa dzeives godi veļteiti vīnam mērķim: vacōku pīmiņas saglobōšonai un īmyužynōšonai – materiali sakūpōti apjūmeigā kompaktdiskā »Franča Kempa un Konstances Kempas dzeive un dorbi«.

Cīši svēteigs Leopolda veikums ir tāva Franča Kempa mērsteigūs palīku pōrvesšona 1991. goda septembrī nu izsyutejuma vītas – Tomskas apgobola Mihailovkas (miris 1952. goda 20. oktobrī) – iz Dzimtini. (Tū ekspediciju vadeja tūreizejais Rēzeknes Latgalīšu kulturas bīdreibas vadeitōjs Pīters Keišs.) Francis Kems guļdeits blokus dzeivesbīdrei Konstancei Zvērgzdines muižas kopu kaļņņā.

Leopolds Kems apbolvōts ar 1991. goda barikažu Pīmiņas zeimi un Latvijas Valsts Aizsardzeibas fonda »Lāčplēsis« Gūda zeimi. Vīnmār beja atsauceigs un sabīdriski aktīvs cylvāks, vysu myužu dōrgu un svātu turēja sovu Dzimtini.

Smogs pōrdzeivōjums jam beja dzeivesbīdres Skaidreites zaudēšona un dāla Andra (Černobiļas upuris) pōragrō aizīšona myužeibā.

Pādejō Leopolda publiskō uzruna beja 2012. goda augustā, kod tyka atklōta pīmiņas plōksne Frančam Kempam pi Rēzeknes piļsātas dūmes.

Myuža dusu Leopolds Kems radis blokus sīvai un dālam Līvānu Jaunajā kopsātā.